

Partido RED Democrático:


“Ta imposibel pa gobierno, Sr. Rafini of ken cu ta, haci cu Aruba hamas lo por legalisa cannabis pasobra banconan intermediario no kier”

Partido RED Democrático ayera diahuebs den un conferencia di prensa a papia tocante un declaracion di presidente di Asociacion di Banconan den cual a splica cu banconan no ta involucra den proyectonan cu ta relaciona cu cannabis medicinal.

Manera ta conoci, e partido aki ta para pa lora ta legalisacion di cannabis pa stimula economia di Aruba. Nan a cuminsa cu e campaña aki for di 2017 caminda cu na 2018 e minister di Economia na e tempo ey, Xiomara Maduro, a presenta den un reunion di presupuesto un pilar economico nobo pa Aruba cu tabata cannabis medicinal.

Na 2021, segun lider di partido Ricardo Croes a menciona, “tur partido a core campaña cu legalisacion di cannabis y aworaki nos ta den eleccion 2024 y nada a tuma luga, cu excepcion cu, entre otro, gobierno di MEP y Raiz a duna como motibo cu no por legalisa cannabis medicinal pasobra cu nan tin problema cu banconan, cu segun nan no ta coopera,” Croes a bisa.

Den un entrevista publica pa Telearuba diaranson ultimo, presidente di Asociacion di Banconan Pierre Rafini a elabora riba e motibo dicon banconan no por involucra den proyectonan cu ta relaciona cu cannabis medicinal caminda el a splica cu “tur banco local ta traha cu banco intermediario na Merca y e banco ey ta los di cualkier afiliacion cu cualkier di



e banconan local na Aruba, nos mester di e banco intermediario pa efectua transferencianan internacional. E banconan intermediario aki ta esunnan cu ta haci e hopi dificil pa nos como banconan por haci negoshi cu cannabis,” el a menciona.

“Den Caribe tin hopi pais cu ya caba a legalisa cannabis pero door cu e entre otro, Caribe y Latino America ta bao un vergrote klas pa cuestion di narcotrafico, esaki ta haci e hopi dificil y pa e motibo aki e reglanan pa banconan den Caribe ta hopi mas severo cu paisnan grandi den region,” segun loke Croes a

bisa.

Tocante e declaracion di Rafini, Croes a declara cu Aruba ta forma parti di e Reino Hulandes cu tin un statuut, e statuut aki den articulo 39 ta papia di un principio di concordancia e cual ta relaciona cu e parti huridico y leynan caminda ta purba di crea un uniformidad entre paisnan den Reino pa no tin diferencia di leynan, discriminacion of preferencia di ni un forma entre e paisnan aki.

Concordancia kiermen di por ehemplo, si Aruba ta carece di cierto leynan pa resolve cualkier problema, e

principio di Reino ta crea un uniformidad den Reino y pa e motibo aki tambe Aruba tin un Corte, Casacion y cada isla of pais miembro tin nan Corte di Prome Instancia, al contrario di Hulanda, e Corte di Prome Instancia di Aruba ta e unico corte cu ta atende tur caso, na Hulanda tin diferencia entre e Cortenan di Prome Instancia.

“Kiermen di pa cuminsa, nos ta biba den un Reino Hulandes cual no mag di tin diferencia ariba cierto nivel y magnitud, di entre otro, esaki sigur sigur, ta cay bou di dje. Ta imposibel pa gobierno, Sr. Rafini of ken cu ta, haci cu Aruba hamas lo por legalisa cannabis pasobra banconan intermediario no kier. Banco intermediario no ta goberna e pais aki. No ta goberna ni un pais rond mundo. Pais ta wordo goberna pa su Constitucion y pa e gobiernonan cu ta satisface e Constitucion aki y ni un otro hende, otro instancia of ni un otro poder,” Croes a sigura.

Den su opinion Croes ta señala cu den caso aki aki ta miedando cu dos midi, “pasobra si mi no ta hera nos tin 12 casino, y for di ki aña nos tin casino? Tur e añanan cu a pasa hasta a bin mas casino, pero segun Sr. Rafini banconan intermediario ta hopi skeptical pa casinonan pasobra ta trata di placa grandi cu no echt, tin un control y e declaracion ta wordo haci awor na 2024. Ta bisa cu no echt tin un control, pero casinonan ta legal. Segun Sr. Rafini no tin un control di ken ta gasta placa,

straño no?”

Di esaki, el a trece dilanti un caso cu Gobierno Hulandes a entama contra un persona cu ta bende cannabis y e ta usa su cuenta personal pa haci pago. Banco no a haya esaki corecto, a cera e cuenta di e persona aki y corte a dicidi cu no ta aceptabel, cu mester habri e cuenta di banco di negoshi pa e persona, e persona a gana su caso y Gobierno Hulandes mester wak con e ta haci pa motibo cu banco no a gana su caso y no tin rason, sino e ciudadano cu tin su Coffeeshop y e tin derecho riba bankrekening.

“Awor a nos ta den Reino Hulandes cu tin un statuut cu ta stipula e reglanan cu e Reino aki ta funciona den dje, e autoridadnan cu cada miembro di Reino tin, e proceduranan huridico y hopi mas, e ta imposibel pa pretende den cualkier un di e paisnan miembro aki, esta Aruba, Corsou y Sint Maarten cu a nos no por legalisa pasobra banconan intermediario no kier, pasobra cu Latino America tin mal number, pasobra Caribe tin mal number. Aruba no ta e prome pais cu ta bay legalisa cannabis den Caribe, ta diferente isla a legalisa caba y cu exito.” Croes a declara.

Den Latino America tambe legalisacion cu fin medicinal a tuma luga den por lo menos ocho pais y solamente dos, Uruguay y Mexico a legalisa su consumo cu fin recreativo.

“Te awor Uruguay no tin ni un problema cu exportacion, cu pago ni cu nada.” Croes a bisa.

Pa Croes e cuestion di banconan ta “algo politico y cu ta imposibel pretende cu hamas ni un pais den Latino America of den Caribe por legalisa, di unda Sr. Rafini por trece esaki cu ta zona asina aki y di un manera straño el a bisa cu ‘productonan deriva di cannabis tampoco mag subi mercado’ no ta cannabis pa huma, ta producto medicinal, cos pa hende malo, tambe ta wordo prohibi. Akinan bo ta ripara cu un wega ta wordo hunga cu bo y nada mas. E wega ta strictamente pa caba cu credibilidad di partido RED Democrático,” Croes a sigura.

